

1 TESALONICENSES

Pablowã queétdih ï túyat tútat

¹ Weém Pablo, yeéb Tesalónica tútchidih moón jwĩ íp Dioíhwã, jwĩ Maáh Jesucristoíhwãbút ñi jumuchah, nin núodih biíhdih daacát túttnit, yeebdíh wã wahna caá. Weém, Silvano, Timoteojĩh, jwiít biíc peihcannit yeebdíh búdí jwĩ túyat túttna caá. Jwĩ íp Dios yeebdíh oinit, ã teo wáaca naáh, ñi túi jumát pínah niijná.*

Tesalónicadih moón ï túut nuumát

² Diosdih uúbhna, “Míih Tesalónicadih moón ï túut nuumátji ã túina caá, Paá”, jwĩpĩ niijná caá.

³ Yeebdíh náhninit, Diosdih nin pah jwĩ níj uúbhna caá: “Paá, míih Tesalónicadih moón meemdíh túi jenah joinít, ma weñat pínahdih ípĩ chãjna caá. Meemdíh oinit, bitadihbút oina, queétdih ípĩ túi teo wáacna caá. Jesucristo ã jwúub dei júúwát pínahdih túi wēi pãinit, meemdíh ï cádahcan caá”, jwĩ niijná caá. Páant ñi jumát dih búdí wēinit, Diosdih “Túina caá, Paá”, jwĩpĩ niijná caá.

⁴⁻⁵ Jwĩ déewã panihnitá, Jesucristoíh túini dooná dih yeebdíh naóhna, oboh jumni naáwát nihcan jíí. Obohjeéhtih, Túini Espíritu ã wēpatjĩh yeebdíh jwĩ naáwáp jí. Páant jwĩ naáwáchah, Túini Espíritu yeebdíh ã teo wáacap jí, jwĩ naáwát dih joinít, ñi jepahat pínah niijná. Páant ñi jepahachah, Dios yeebdíh oinit, áihwã pínah ã ñíwat dih jwĩ

* **1:1** Hch 17.1

jéihna caá. Ñijeéh jumnit, yeebdíh jwĩ túi teo wáacatjidih yeebbút ñi jéihna caá.

⁶ Ñijeéh jumna, ded pah jwĩ chājatjidih ennit, jwĩ Maáh Jesucristo ded pah ā jumati doonáidibut jéihnit, yeebbút biíc yoobó ñi chājna caá. Jesúih túini doonáidih joíhcan íjna, bita yeebdíh yeejép ĩ chājachah yuhna, Túini Espíritu yeebdíh ā teo wáacachah, yeéboó wēinit, Diosdih ñi túi joyóp jĩ.*

⁷ Páant ñi jumati doonáidih joinít, nihat níih baác Macedonia baácidih moón, nin baác Acaya baácidih moón Jesúihwā ñi jumati pah mantih túut nuumná caá ĩ chājap.

⁸ Pánihna, jwĩ Maáh Jesúih doonáidih jepahnit, ñi túi túut nuumátji doonáidih joinít, bitabut jwĩ Maáhdih ĩt jepahap wat jĩ. Níih baácidih moón, Acaya baácidih moonjéibut nihcan, nihat baácidih moón Diosdih ñi túi jepahat doonáidih ĩt joyóp wat jĩ. Ñi wāt yáana caá. Jwiítboó níih doonáidih queétdih jwĩ naóh jwahcah, queét jātih ĩtát joyóp tabe.

⁹ Pánihna, ñi túut nuumát doonáidih jwĩ naáwát déedih, yeéb jwiítidih wēi jwāáhnit, ñi túi joyátjidih ĩpĩ jwāáh naáwáp jĩ. Ñi pāpninadih uúbh cádahnit, Dios yoobátidihjeh wēi uúbhnit, ā watatdih ñi túi jepahatjidihbut ĩpĩ naáwáp jĩ.

¹⁰ Dios wúuh jeámant ā jwúub dei júúwát pínahdih ñi túi páñatidihbut ĩpĩ naáwáp jĩ. Caán Jesús wannijidih yahna, Dios át boonap tajĩ. Caan tugaá Dios yeejép yoobát ā peéh chājat déedih jwiítidih ā túi ubna caá.

* 1:6 Hch 17.5-9

2

Tesalónicadih jumna, ded pah Pablo ã jummatji

¹ Ñijeéh jumna, yeebdíh jwĩ bohénachah, túi wēi joinít, ñi jepahap jĩ. Páant ñi jepahachah, jwĩ tewat oboh jumni nihcatdih ñi jéihna caá.

² “Pablowã jwiít dih enedih ï jũwát pínah jãtih, Filipos tátchiboó ï bohénachah, ïjnít, caán tátchidih moón queétdih yeejép ï chãjap jĩ”, yeéboó ñi niúj náhnina nacaá. Obohjeéhtih, Filiposdih moón jwiít dih yeejép ï chãjachah yuhna, úumcanjeh, Jesúih doonádih yeebdíhbut naáwádih jwĩ jwibínap jĩ. Biquína ñih tátchidih moón maáta jwiít dih ï naóh cádahat túutuchah yuhna, Dios ã teo wáacatjĩh Jesúih doonádih yeebdíh jwĩ túi naáwáp jĩ.*

³ “Pablowã yoobóp dih ï naóhcan caá. Yeebdíh pánih bohéna, queétdih ñi weñat pínahdihjeh ï bidna caá”, biquína ï niúj yeena caá.

⁴ Obohjeéhtih, Dios jwĩ jenah joyátdih jéihni nin pah ã niúj naáwáp jĩ: “Jesúih túini doonádih ï naáwát pínah niijná, Pablowádih wã wahbipna caá”, ã niújp jĩ. Pánihna, caandíh naóhna, “Pablowã túi chãjnit caá”, bita ï niúj jenah joyát pínahdih jwĩ bidcan caá. Diosboó “Ï túi chãjna caá”, ã niújtat pínahdihjeh bidnit, Jesúih doonádih jwĩ naáwáp jĩ.*

⁵ Pánihna, yeebdíh naóhna, túini niújtat pah ni-ijcán, ñih bí déedih náahcan, ded pah jwĩ bohéatjidih ñi jéihna caá. Diosbut páant jwĩ chãjatjidih ã jéihna caá.

⁶ “Pablowã chah jéihnít caá”, yeéb, bitabut ñi niúj jenah joicát pínah niijná, yeebdíh jwĩ bohénap jĩ.

* 2:2 Hch 16.19-24; 17.1-9 * 2:4 Gá 1.10

⁷ Jesucristoíh túini doonádih yeebdíh naáwát túutna, Dios ã wahnit jumna, yeebdíh búdí jwíta jéih wat tagaá. Obohjeéhtih, pánih watcan, búdí oinit, chaíhjah bohéna, yeebdíh jwí yójahcap jĩ. Nomanih mi wááhdih túinijeh mi en dawát pah yeebdíh jwí bohénap jĩ.

⁸ Yeebdíh búdí oinit, wēina, nihat yeó jáap jummat pah túini doonádih jwí naáwáp jĩ. Bitá jwiítidih ĩ mao yohíhadih jéihna yuhna, yeebdíh jwí teo wáac cádahcap jĩ.

⁹ “Jwíjeéh ĩ jum láa, ĩih bácah ã chuunáchah yuhna, búdí ĩ tewep jĩ”, ñi niúj náhnina nacaá. “Baáb jéenat pínah játih teo jwíihnit, páú nihat yeó jáap teo táah bejnit, chei tac yoob póhba ĩpĩ teo cádahap jĩ. Pánihna, Dioíh túini doonádih naóhnit, jwiítidih tac buugáihcan, ĩ jeémát pínahdih jíib chājat túut niijná, búdí ĩ tewep jĩ”, ñi niúj jéihna caá.*

¹⁰ “Jwíjeéh jumna, Dios ã weñat pínahdihjah chājnit, ĩ túi jumap jĩ”, ñi niúj jéihna caá. Diosbut caandíh ã jéihna caá. Pánihna, bita “Pablowā yeejép ĩ jumap jĩ”, ĩ jéih niijcán caá.

¹¹⁻¹² “Jwiít nihatdih túinijeh ĩ bohénachah, jwí túi joyóp jĩ. Biquínadibut jwiítidih ĩ naáwáp jĩ. Ded ã wehdih ã túi bohéat pah jwiítidih ĩ túi naáwáp jĩ. Dios ã weñat pínahdih ded pah jwí chājat pínah niijná, búdí ĩ bohénap jĩ”, ñi niúj jéihna caá. Dios yeebdíh át ĩiwip wat jĩ, áihwā jumnit, ájeéh ã maáh jumapboó ñi jummat pínah niijná. Páant yeebdíh jwí bohéatjidibut ñi quíib buudcán nacaá.

¹³ Pánihna, yeebdíh jwí naáwátidih ñi túi jepahachah náhninit, búdí wēinit, “Túina caá, Paá”,

* **2:9** Hch 18.3; 2Ts 3.8

Diosdih jwĩpĩ niijná caá. ã naáwátdih yeebdíh jwĩ bohénachah, nin pah ñi niúj jenah joyóp jĩ: “Í jenah joyátjĩhjah naóhna í chãjcan caá. Dios naáwát yoobát jwiútdih bohéna caá í chãjap”, ñi niúj jenah joyóp jĩ. Pánih jenah joiná, caán naáwátdih joinít, Jesúsdi h jepahna, táiniboodíh táat nũũmná caá ñi chãjap.

¹⁴ Judea baácdih moón Dioíhwã í jumat pah yeebbút biíc yoobó ñi jumna caá. Dios ã wahni Jesucristodih queét í jepahat jíib, ñih baácdih moón judíowã, queétdih yeejép í chãjap jĩ. Pánihat pah muntih, yeebbút Jesúsdi h ñi jepahat jíib, ñíih baácdih moonjéh yeebdíh yeejép ít chãjap taga.*

¹⁵ Queét judíowã jon jãtíh Dios naáwátdih naóh yapanitjidi h yehna niijnít, ít mao yohop tajĩ. Túttimah, jwĩ Maáh Jesucristodihbut ít mao yohop tajĩ. Túttimah, Dios naáwátdih ñi joicát pínah niijná, jwiútbodíh ñíih tútchimant í bacanap jĩ. Pánih chãjna, Diosdih búdí íjanit, ni hat cáacwãdihbut í eníhcan caá.*

¹⁶ Judíowã nihcannit iiguípna í bejat déedih náahcan, Jesúsdi h doonádi h naáwádi h jwĩ bejehchah, judíowã jwĩ naáwátdih í jãhíhip yah jĩ. Pánihna, Diosdih yehna í niiját jíib, íjnit, Dios queétdih búdí ã peéh chãjbipna caá.

Pablo Tesalónicadi h moondíh ã jwũũb eníhat

¹⁷ Yeebdíh wã cádah jũũwúchah, wíih caolih ñijeéh ã páñap be. Maátcanjeh ñijeéh wihcan yahna, yeebdíh búdí jwĩ bidip be.

* **2:14** Hch 17.5 * **2:15** Hch 9.23,29; 13.45,50; 14.2,5,19; 17.5,13; 18.12

18 Pánihna, búdei oina, yeebdíh enedih jwĩ jwúub bejhip yah be. Weemjéh dawá láa yeebdíh búdei enedih wã bejíchah yahna, Satanás jwĩ jib bejatdih ã jãhap jĩ.

19 Yeebdíh Jesúih doonádih jwĩ naáwáchah, ñi táí joyátjidih náhninit, búdei jwĩ wěina caá. Jwĩ Maáh Jesús ã jwúub dei júwúchah, ñi jepahatjidih jenah joinít, búdei wěina, “Jwĩ naóhniji táini doonádih ĩ táí jepahap jĩ”, Jesúsdih jwĩ niúj naóhbična caá.

20 Pánihna, yeebdíh jwĩ naáwáchah, ñi jepahatji jíib, jwĩ Maáh jwiítidih ã wěi naáwátidih jéihnit, jwiítbut búdei jwĩ wěina caá.

3

Timoteodih ã wahat

1-2 Pánihna, yeebdíh búdei náhni dahwanit, yeebdíh ã enat pínah niijná, Timoteodih ñi pebhna jwĩ wah bojop be. Caán jwĩ úud panihni, weemdíh pej jumni, Cristoih táini doonádih ãpĩ naáwáp jĩ. Diosjeh caandíh ã wahachah, weemdíh búdei ã teo wáacáp jĩ. Pánihna, yeebdíh ã bohéat pínah niijná, ñi pebhna caandíh wahniji, Atenas tútchiboó biícjeh wã páñap jĩ.*

3 Jesúsdih ñi jepahatji jíib bita yeebdíh yeejép ĩ chãjachah yahna, Diosdih ñi cádahcat pínah niijná, yeebdíh wã bohéat túatup jĩ. “Jesucristodih jwĩ jepahachah, jwĩ túat nuumátidih iijnit, ãihwã nihcannitboó jwiítidih yeejép ĩ chãjbipna caá”, jwĩ niúj jéihna caá.

* 3:1-2 Hch 17.15

⁴ Ñijeéh jumna, páant jwĩ yapat pínahdih dawá láa yeebdíh jwĩ naáwáp jĩ. Bũũ jwĩ naáwátji pah ã yapatdih ñi jéihna caá.

⁵ Pánihna, ded pah ñi jummatdih búdí jéihíhna, Timoteodih wã wahap jĩ. “Nemépwã ã maáh queétdih ã yee naáwáchah, ¿queétboó caandíh yehna ã niijná níit? Yehna ã niijcáh, nihat conboó jwĩ bohéat búdí jwĩ tewatji bũũdní ã jumbipna caá”, wã niij jenah joyóp jĩ.

⁶ Bũũ Timoteo, ñi pebhboó juibíniji, ã jwáub juyáp jĩ. Jwáub jwinít, “Nihat Tesalónica tútchidih moón meemdíh búdí ã túyat túutur be. Queét Dios naáwátdih táí joiná beé ã chãjap be. Táí joinít, Diosdih búdí oinit, ã míic táí oina beé. Yeebdíh náhninit, búdí wëinit, yeebdíh ã bidna beé. Yeéb queétdih bidnit, búdí enedih ñi bejíhat pah muntih, queébtut yeebdíh ã bidna caá”, weemdíh ã niij naáwáp jĩ.*

⁷ Páant ã niij naáwáchah, yeebdíh jwĩ náhni dahwaat ã yayáh bejep jĩ. Yeéb Dios naáwátdih jepahnit, ñi táí jummat doonádih joinít, bita jwiítdih yeejép ã chãjachah yuhna, búdí jwĩ wëina caá.

⁸ Yeéb jwĩ Maáh Jesúsdiñ ñi táí péenachah, jwíih caolíh búdí ã wëina caá.

⁹ Pánihna, “Paá, ma teo wáacatjĩh queét Jesúsdiñ ã táí péeatdih jéihna, búdí wã wëina caá. Páant weemdíh ma weñaat ã táina caá”, Diosdih wã niijná caá.

¹⁰ Pánih wëinit, yeó jáap, cheibut Diosdih búdí jwĩ úubhna caá, yeebdíh enat túutna, jwiítdih ã wahat pínah niijná. Yeéb Jesúsíhwã ded pah ñi táí chãjat pínahdih beh joyát yeebdíh páantjeh ã judhduchah, ñi pebhna jwáub bohénadiñ jwĩ bejíhna caá.

* 3:6 Hch 18.5

¹¹ Yeebdíh jw^{úub} enedih jwí bejat pínah niijná, Satanás ã jãhat panihatdih ã yohat pínahdih jwí íp Diosdih, jwí Maáh Jesucristodihb^{ut} búdí jwí ^{úub}hna caá.

¹² Pánih ^{úub}hna, jwí Maáh yeebdíh ã teo wáacat pínahdih jwí ^{úub}hna caá, chah míic oinit, nihatdihb^{ut} ñi oyat pínah niijná. Pánihna, yeebdíh búdí jwí oyat pah m^{ant}ih, yeebb^{ut} biíc yoobó ñi oyat pínahdih wã náah yacna caá.

¹³ “Paá, queétdih ma túi teo wáacá, ma weñat pínahdihjeh ã chãjat pínah niijná”, jwí niíj ^{úub}hna caá. Páant ã teo wáacachah, jwí Maáh Jesucristo nihat ãihwãjeéh jw^{úub} dei jũóh^{nit}, Jesús jwí íp Diosdih nin pah ã niíj naóhbipna caá: “Queét táinit ã j^{um}chah, queétdih dedé peéh chãjat pínah ã wihcan caá”, ã niijbípna caá.

4

Dios ã weñat pínahdih ded pah ã chãjat

¹ B^{uu} biíh bohéatdih yeebdíh jwí naáwát túut caá. Ñijeéh jwí j^{um} láa, Dios ã weñat pínahdih ded pah ñi chãjat pínahdih jwí bohénap jí. Páant jwí bohéatjidih ñit quíib b^{uud}cáp taga. Páant ñi chãjat chah ñi túi jepahatdih yeebdíh búdí jwí náah yacna caá.

² Jwí Maáh Jesucristo ded pah ã w^{ut}atjidihjeh yeebdíh jwí naóh yapaatdih ñi túi jéihna caá.

³ Nin pah ñi j^{um}at pínahdih Dios ã náah yacna caá: Diosdih jepahcannit ã j^{um}at pah yeebb^{ut} ñi j^{um}ca bojoó. Ñi áa nihcannitj^{ih} yeejép ñi chãjca bojoó.

⁴ Dios ã enechah, cãacwãb^{ut} ã enechah, ñi túi áa j^{um}ú. Pánih áa j^{um}nit, mijeéh ñi túi j^{um}ú.

5 Diosdih jéihcannit ã áa nihcannitjñh ãpĩ metna caá. Obohjeéhtih, yeéb Diosdih jéihnitboó páant ñi chãjca bojoó. Ñi weha mána yaádhjeéh túinijeh ñi jũmũú.

6 Mijeéh bóojeéh jũmnihdih ñi dúuc wái metca bojoó. Dios nihat ñi chãjatdih jéihnit, páant ñi chãjat jíib búdí ã peéh chãjbipna caá. Jon ñi pebh jũibínitji caandih búdí jwĩ bohénap jĩ.

7 Dios jwiítidih íí náah chãjatdih wũtcan, túinijeh jwĩ jumat pínahdih ãt wũtũp wũt jĩ.

8 Butéh wã naáwátidih weemjéh wã wũtat nihcan beé. Dios yeebdih páant ã wũtatdih wã naóh yapanap be. Pánihna, ded caandih yehna niijná, weemdih nihcan, Diosboodih ã yap yohna caá. Caán caá Túini Espíritudih yeebdih wũhni.

9-10 Bũũ míc oyatdih yeebdih bainí wã naáwát túut caá. “Ñi míc oyoó”, Dios ã niij wũtatdih joinítji caandih túi jepahna caá ñi chãjap. Pánih jepahna, nihat ñiñh baác Macedoniadih moón Jesúhwãdih yeéb ñi túi oina caá. Pánih míc oinit, chah míc teo wáacnit ñi jũmũú.

11-12 Pánih míc oina, biícidih túinijeh ñi jũmũú. Míc jũihcanjeh, bitadih yeejép táoh naóhcan, bita ã tewatdih tũbit ñi en naóhca bojoó. Yabhcanjeh, ñi túi teweeé. Pánih teonit, bitaíh bií déedih, ñih jeémátidihbũt tũbit ñi wũbh tac bũugáca bojoó. Pánih wũtatdih jáantjeh yeebdih jwĩ naáwáp jĩ. Caandih ñi jepahachah, Diosdih jéihcannitboó yeebdih ennit, “Queét túi chãjnit caá”, ã niijbipna caá.

Jesucristo ã jwũũb dei jũũwũchah, ded pah ã yapat pínah

13-14 Bũũ, jwĩ déewã panihnitá, Jesúíhwã ã wũnũchah, ded pah ã yapat pínahdih yeebdíh jwĩ naáwát túut caá, tabit ñi jĩgahcat pínah niijná. Jesucristo ã wũnat túttimah, Dios caandíh át jwúub boonanap tajĩ. Caan páh mũntih jwiít áihwã jwĩ wũnat túttimah, jwiít dihbat ã jwúub boonanachah, Jesús ã jũmũpboó ájeéh jwĩ túi jũmbipna caá. Páant jwĩ yapat pínahdih ñi túi náhninaá. Pánih náhninit, Jesúíhwã, ñi oinit ã wũnat túttimah, ñi bidna yũhna, tabit ñi jĩgahca bojoó. Bitá Jesúsdih jepahcannit, Jesúsjeeh ã wihcan niít. Pánihna, ã oinit ã wũnat túttimah, ã jwúub míic encat pínahdih jéihna, búdí jĩgahnit, ã moh yéejna caá. Obohjeéhtih, Jesúsdih jepahcannit ã jĩgahat pah yeéb ñi jĩgahca bojoó.

15 Nin pah Jesúsjeh ã naáwátjidih yeebdíh jwĩ naóh yapana caá: **“Queét wííhwã wũnnitji ã boo pud jũúwát pínah jãtíh, wũncannit ã waóh pũuh laab béj páican niít”**, Jesús át niijíp wat jĩ.

16-17 Nin pah ã yapbipna caá: **“Ñi pũuh laáb jũúwá”**, Jesús ã niij ejatdíh, ángelwã ã maáh búdí ã ejatdihbat jwĩ joibípna caá. Dios ã wũhni póojat nahjĩh ángelwã ã maáh ã póojochah, jwĩ joibípna caá. Páant ã yáanachahjeh, jwĩ Maáh Jesucristo ã jwúub dei jũóhbipna caá. Páant ã dei jũúwúchah, áihwã wũnnitji, Jesús ã boo pud jũúwátji pah mũntih, ã boo pud jũóhbipna caá. Queét ã boo pud jũúwúchah, jwiít áihwã wũncannit, ã jeéh wáac jũibínit, wépép pũuh laab béjnit, mah tólihna nihat bíicdih jwĩ Maáh Jesúsdih jwĩ jwááhbipna caá. Pánihna, jwiít nihat bíicdih Jesúsjeeh páantjeh jwĩ jũmbipna caá.*

18 Pánihat pínahdih jéihnit, yeéb bitadidihbat jwúub

* 4:16-17 Mt 24.30-31; Mr 13.26-27; 1Co 15.51-52

naóh yapanaá, Jesúíhwã wunnitdih tubit ï jġgahcat pínah niijná.

5

¹⁻² Bũũ, wã déewã panihnitá, Jesúíhwã wunnit ded pah ï yapat pínahdih ñi jéihna caá, bũca. Obohjeéhtih, débólih Jesucristo ã jwúub dei jũóhni yeó jáap pínahdih jwiit cãacwã jwĩ jéihcan caá. “Náhnicaħ, nũũmní ã juyát pah jwĩ Maáh Jesucristo ã jwúub dei jũóhbipna caá”, yeebjéh ñi niij jéihna caá. Páant ñi jéihyechah, wã jwúub naóhcan niit.*

³ Diosdih jepahcannit nin pah ï niijbípna caá: “Bũũ túini láa caá. Cãacwã ï míic maocah, úũmcanjeh, jwĩ túi jamna caá. Yeejép yapat jwiitdih ã wiħcan niit”, ï táoh niijbípna caá. Páant ï niijíchahjeh, caandíħ ï jepahcatji jíb, Jesús peéh chãjadiħ ã jwúub dei jũóhbipna caá. Yaádh ï weép jáaat dée pah ã jambipna caá. Wudũ jammih mi weép jáanachah, caán tubatdih mi jéih jweicán caá. Pániħat pah Jesucristo ã jwúub dei jũúwúchah, caandíħ jepahcannitji ï yéejat jíb ï jéih jweicán niit.*

⁴⁻⁵ Obohjeéhtih, wã déewã panihnitá, yeébboó dupúnap panihpboó jamcan, baabáp panihpboó ñi jamna caá. Jesúsdiħ jepahcannit, bita ï encat pínah niijná, dupúnapboó yeejép ĩpĩ chãjna caá. Obohjeéhtih, yeébboó páant ñi chãjcan caá. Pániħna, náhnicaħ nũũmní ã waád juyát pah, Jesús ã jwúub dei jũúwúchah, ñi wúhi bejcan niit. Yeebdíħ peéh chãjadiħ jũóhna ã chãjcan niit.

* **5:1-2** Mt 24.43; Lc 12.39; 2P 3.10 * **5:3** Is 13.8

⁶ Jwiít Jesúhwã j̄mna, caandíh jéihcannit ì chãjat pah jwiít dih chãjcat caá náahap. Æonit panihnit j̄mna, ded pah nin baácboó ã yapatdih queét ì jéihcan caá. Obohjeéhtih, jáanit panihnit, “¿Dios ã weñat pínahdih chãjat túut niijná, ded pah wã chãjbi?” niij jenah joyát caá jwiít dih náahap. “Waícanjeh Jesucristo ã jwúub dei jũóhbipna caá”, niij náhninit, túi chãjat caá náahap.

⁷ Jesús dih jepahcannit, dupúát panihpboó j̄mna, ãonit panihnit caandíh ì joicán caá. “Jesús ã jwúub dei jũóhcan niít”, niij jenah joinít, ì weñat pínahdihjeh chãjnit, ìpí babh máihna caá.

⁸ Obohjeéhtih, jwiít baabáp panihpboó j̄mndih Dios naáwátdih túi jenah joyát caá náahap. ã weñat pínahdih jenah joinít, yeejép chãjcat caá náahap. Soldado míc mawadih bejna, ìtah wao chá páha páahnit, ãih bácahdih jãhat pínah niijná, ìtah chóodihbut ãih tacamant ãpí duoná caá. Pánihna, soldado ã míc jãhat pah, jwiít Jesúhwãdihbut míc jãhat caá náahap. Obohjeéhtih, jwíih bácahdihjeh pohba jãhatdih niijná wã chãjcan caá. Jwíih caolihdih jãhatdih niijná caá wã chãjap. Nin caá jwíih caolihdih jwí jãhat pínah: Jesucristodih túi jenah joinít, Diosdih cáacwãdihbut túi oyat caá caolihdih jãhat ã j̄mup. “Jesús wã yéejatdih yohnit, weemdíh ãjeéh ã ub bejbipna caá”, niij jenah joyátbut caolih jãhat ã j̄mna caá. Pánih jãhnit panihnit j̄mna, Satanás jwiít dih ã yéejat túutuchah, caandíh jwí jéih yap yohna caá.*

⁹⁻¹⁰ Jesucristodih jepahcannit biíc dih Dios

* 5:8 Is 59.17; Ro 13.12; Ef 6.13-17

jwiítboodíh át peéh chājíhcap wut jī. Obohjeéhtih, áihwā jwī jumat pínah niijná, jwī yéejat jíib, jwī Maáh Jesucristo jwiít dih át wun wāhup wut jī. Pánihna, jwiít áihwā jumnit, nin baácboó páantjeh jumna, wunna yuhna, nihat biíc dih ájeéh jwī táí jumbipna caá.

¹¹ Caandíh náhninit, Jesús dih ñi táí jenah joyát pínah, ñi jepahat pínahdihbut páantjeh ñi míc teo wáacá.

Pablo queédih biíh ā wut

¹²⁻¹³ Buu yeebdíh bainí wā jwáub naáwát túut caá, páant muntih. Ñijeéh jumnit Dios naáwát dih yeebdíh í bohénachah, ñi táí joyoó. Yeebdíh bohéat pínah niijná, Diosboó queédih ā wutuchah, yeebdíh bohénit, bádí í teona caá. Pánihna, queédih oinit, ñi táí jepahaá. Yeebbút míc oinit, biíc dih ñi táí jumú.

¹⁴ Yabhnit dih ñi tewat túutá. Uumnit dih, jīgahnit dihbut ñi weñanaá. Wēpcannit dih ñi táí teo wáacá. Bitadih yójahcan, íjeéh ñi táí jumú.

¹⁵ Yeebdíh yeejép chājnit dih ñi yéej chāj jwáubaca bojoó. Nihat dih táí chājnit, biíc dih ñi táí jumú.

¹⁶ Ded pah yeejép yapna yuhna, Dios dih táí jenah joinít, páantjeh ñi weñeé.*

¹⁷ Caandíh ñi úbh cádahca bojoó.

¹⁸ Yeó jáap jumat pah “Túina caá, Paá”, Dios dih niijnít ñi jumú. Túí yapna, yeejép yapna yuhna, biíc yoobó “Túina caá, Paá”, niijnít ñi jumú. Pánihat dih Dios yeéb Jesúsíhwādih ā náah yacna caá.*

* **5:16** Fil 4.4 * **5:18** Fil 4.6; Col 4.2-7

19 Túini Espíritudih túi jepahnit, ded pah ã teo wáacatdih ñi jãhca bojoó.

20 Dethdih Túini Espíritu ã naáwáchah, queét ì naóh yapaíhichah, yeébbóó jóíhcannit pah ñi jumca bojoó.

21 Pánihna, nihát naáwátidih túi jenah joinít, ded túini, ded táicanni ã jummatdih ñi jéihyeé. Pánih jéihna, táinidih jepahnit, ñi náhninaá.

22 Obohjeéhtih, táicanniboodíh, ñi joyáh bojoó.

23 Jwiít yeebdíh Dios ã túyatdih búdí jwí náah yacna caá. Pánihna, yeebdíh uúbhna, “Paá, queét míhwādih búdí ma teo wáacá, yéej chãjatdih ì yap yohat pínah niijná. Meemdíh ì túi jenah joyát pínahdihbut teo wáacnit, queétdih ma túi wapaá”, búdí jwí niij uúbhna caá. Páant ã teo wáacachah, jwí Maáh Jesucristo ã jwúub dei jũóhni yeó jáapdih yeéb ãihwã táinit ñi jumcipna caá.

24 Diosjeh yeebdíh ñíonit, ã niijátji pah yeebdíh ã túut nuúm péabipna caá.

Pablo ã péé túyat tútat

25 Wã déewã panihnitá, jwiítidihbut búdí ñi uúbú.

26 Dios ã oyatjñih nihát Jesúíhwã ñi túi míc uúbú.

27 Jwí Maáh Jesús ã enechah, nin pah yeebdíh wã naóhna caá: Nin núodih ñi pebhna ì ub juibínachah, nihát caánboó jumnit Jesúíhwādih ñi túi en naáwá.

28 Jwí Maáh Jesucristo yeebdíh oinit, ã túi teo wáaca naáh.

Páant bóojeh tigaá wã naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
34c9543b-57a6-5290-ab7b-4fa15529a7e2